

皇明經世文編

皇明經世文編卷之三百四十八

陳子龍臥子 徐孚遠闇公

華亭

編輯

宋徵璧尚木 唐允諧尹季

武塘錢 梅彥林叅閱

戚少保奏疏

疏

戚繼光

請建空心臺疏

空心臺

禦戎之策惟戰守二端除戰勝之事別有成議外以  
守言之東起山海西止鎮邊地方綿亘二千餘里擺

守卑薄，室將塞垣，稍爲加厚，二面皆設梁，其計七八十梁之間，下穿小門，曲突而上，又于緩者百步，衝者五十步，或三十步，即騎牆築一臺，如民間看家樓，高五丈，四面廣十二丈，虛中爲三層，可住百夫，器械饒糧，設備具足，中爲疏戶以居，上爲雉堞，可以用武，虜至即舉火出臺上，瞰虜方向高下，而皆以兵當埤，其臺之位置，視山之形勢，參錯委曲，務處臺于牆之突，收牆于臺之曲，突者受敵而戰，曲者退步而守，所謂以守而無不固者也。以臺數計之，每路約三百座，薊

昌十二路，共三千座，每臺給銀五十兩，通計十五萬兩，每歲解發五萬，完臺一千，三年通畢，如此則邊關有磐石之固，陛下無北顧之憂矣。

請申軍令以壹士心疏

申軍令

邈以秋防戒嚴之月，節據喜峯等哨夜報稱東西二虜合謀，徑犯薊鎮，東虜土蠻會同北邊，從無看見邊牆的生夷，劄灤等都調到正北，地名打卜酥，即是鹽廠地方，土蠻住牧處所，聚兵俱齊，西虜安灘黃把諸酋，聚兵亦齊，見今起身東行，內東虜犯喜峯口，迤東

太平燕臺石門等路，西虜各分爲三大枝，分犯古北曹牆馬蘭等路，旦夕有事，除臣嚴爲分布固守，及秣馬待戰外，看得薊鎮自庚戌以來，止是一路入犯，以全鎮之力，調集二三路之間，幸曾守固一二次，今報東西並犯，已分道矣，而西虜之中，分而又分，緣其部落衆多，雖分亦有餘力，在我兵力有限，無所不備，勢分力寡，仰仗皇威，十一路之中，兵賊相值，攻守兼備，必期堵回，實爲不戰而屈人兵，策之上也。但邊長力薄，萬一致有一處潰牆而入，則十路皆有全功，當

以血戰爲主。查得先該軍門議主條約責臣行各統領援兵將領偏裨自上而下各取保結並無臨陣退縮不堪之人固已教之首尾聯屬之義近又復行自下而上軟血誓神每兵九名保一隊總隊總三名保本旗總旗總三名保本百總百總三名保本把總把總二員保本千總中軍千總中軍保本將領將領保臣臣保督撫兵備若有失陷者各甘抵命是又責以親上效長之道此節節而制之之術即血戰之法也。然血戰之勢在度虜形彼既數十萬衆我軍最少亦

須數萬方可對壘。今查全鎮擬定主客標路戰兵馬步不下五六萬。北之虜勢衆寡。雖有不同。氣勢足充一陣。但以寡禦衆之道。須聯數萬人之心爲一心。合數萬人之力爲一體。則勢齊力倍。勇氣自增。所謂撼山易撼岳家軍難之機也。第恐號令之傳宣。雖一新于目耳。而沉痾之積染。未痛改于身心。往日薊鎮之弊。其叅遊之視督撫總兵。與中軍千把總之事叅遊軍士之視中軍千把總。平日禮文。尚有可觀。一臨壘之時。將領並不聽受主將約束。雖督撫亦不之畏矣。

其心以爲虜旣潰入旣已破矣彼爲主將者非遭鋒鏑之殘卽有桎梏之速泄泄然伺虜之出望望然知將之去終不能奈我何也且失事者以斧鉞在前不暇督人之過卽鳴之纜纆之中誰復爲地方之計而繼厥任者始固昧于不知其詳中則諉爲不切于已終則責以報効于後不惟不加之罪而且復施之恩至有僨事于此而允其報効于彼朝以失陷主將而暮由保薦拜官甚至一陣之間有目擊主將之喪亡而不救身猶冒功以陞擢者人亦何苦而必與主將



同歿耶此一陣之間萬人爲心如之何能破虜成功  
以伸 皇上之天威哉臣因痛偏裨士卒之未必同  
心誓歿決戰故敢颺言于未歿之前以爲求歿報不  
如功報之爲愈也竊計虜犯之時臣必首率驍健登  
壇拒敵賊若先以步虜乘險而登臣當其騎墻欲潰  
之際即督南兵殺手數千名仰而攻之決期堵回但  
恐不在臣駐之左右而遠隔數十里之外步兵馳救  
不及賊必大入臣即一面以部士抵當一面調集各  
路援兵及請督撫各標兵或堵於所犯之途或邀於

隋歸之際酌量機宜誓決一戰務必大挫虜鋒使之  
狼顧奔北雖不能救東隅之失亦可收桑榆之功所  
可慮者兵機變於呼吸之間人心動于死生之路臣  
雖一人當先不過一人之力所殺幾何必臣倡之大  
小將領從而和之同心協力一鼓而前庶可成血戰  
之功然必仰藉 皇上威靈叮嚀諄示庶幾人心齊  
一令於決戰之時敢有偷生之徒違臣號令者除頭  
目以下欽遵近例都許軍法行事其叅遊而上恐臨  
時無暇行法容臣即時綁送軍門照武官都指揮例

當陣以軍法示衆。至若衆將棄臣奔北。臣果力戰殞身。均乞皇上渙頒明旨。必寘之法典。旣不使巧詞漏網。亦不使倖計夤求。若諸將爭先奮殺不退。臣有歿傷。亦不相累。至于失陷將領之中軍千總。失陷中軍千總之把總百總。失陷把百總之旗隊總。失陷旗隊總之兵士。一聽撫按一體查明。處以死刑。毋使苟免。臣雖一歿而後之士卒。皆知法無所逃。將領得藉偏裨之力。偏裨得藉士卒之力。未必不由于此也。或議數萬之衆。難以加罪。殊不知所罪者。乃首先奔

北失陷頭目。本部曲凡下一等之人。譬如失一叅遊。所誅不過中軍千總三四人耳。以下則勿問矣。失一千總。所誅不過把總二人。以下則勿問矣。失一把總。所誅不過百總三人。以下則勿問矣。失一百總。所誅不過旗總三人。以下則勿問矣。失一旗總。所誅不過隊總三人。以下則勿問矣。失一隊總。所誅不過步兵九人。其他則勿問矣。究竟不過誅數十人而止。若果我兵全勝。虜衆大敗。勿問陣亡何項將領。不係奔北。失陷者皆不連坐。如此則血脉貫通。氣勢聯絡。法未

嘗不約而畏法者衆。罪不必加衆而及之者均。雖欲不一心，自不敢也。所謂誅一人而千萬人懼者此耳。臣復慮首功所斬有數，前進原非一軍，奔北亦非一騎，退却不止，失陷頭目之輩，尤當別立一法，以輔勸懲之所不逮。合無將用命之士，齊心向前，果有首功者，照例紀錄，其附和之衆，當以加糧爲賞，逐次漸加，使之終身得支，以爲衆望。設或逡巡畏縮，望風潰亂者，亦當槩減其糧，以示懲戒，以其所減益於所加，必待再有功勞，方准議復。如此，則人心齊肅，賞罰加明。

我兵雖少亦可成一戰之功以寡敵衆之計無出于此者矣伏乞 勅下兵部再加詳議 特賜施行則人心可一國法益彰愚臣誓死之志或可少盡而籌邊之策未必無小補也再照兵機必以耳目分明爲先。薊鎮耳目不明奸猾得計此不用命之要領也往日各該大小將領但遇虞勢臨邊先行分布心腹人役入京臨時亂行差人徑報閣部甚至布滿密要虛傳功伐忌害阻陷駕罪攘勞無所不至夫其人專一用心於此又肯臨時用命哉爲今之計伏乞 勅下

兵部一行督撫臣等，今後叅遊守提等官，凡遇大小事情，止許差人飛報督撫，按道鎮協衙門酌量事體，輕重緩急，或通行提備，或轉報部科，一行五城兵馬司，但有叅遊以下，布設腹心於京都內外者，出示地方，報官拏問，其濫報違禁者，許兵部就行解發軍前，兼其將領拏究，至于臣雖一鎮統兵主將，但獲功則當不伐，有罪則當順受，凡涉功罪之際，亦止徑報督撫巡按轉奏，亦不敢肆行濫報，至于將領生奸誤事者，容臣徑奏，或徑以軍法處治，庶功罪之核，不眩于

耳目而弊絕心齊自圖實効矣

皇明經世文編卷之終

皇明經世文編

成少保集

申軍令

平五路



皇明經世文編卷之三百四十九

華亭

陳子龍臥子

宋徵璧尚木

選輯

徐孚遠闇公

李待問存我

朱積早服參閣

戚少保集

議

戚繼光

辨請兵

調南兵  
用車戰

今以數萬之衆馳突于原野如風雨驟集山崩河決  
一擁而至此胡虜之常而中國以為必不可禦之勢

也。于是乘墻列守。以爲萬全之策。奈邇來邊形齒。軍士煎銷。勢分力弱。守愈不足。乃就中掄各部曲之壯者。不滿數千。隸于總督。巡撫。總兵。標下。謂之標兵。用以備戰。是每鎮所恃以爲戰陣之具者。數千輩而已。故方賊之張也。或守城郭。或據形險。或追送百里之後。或出沒爲趨避之圖。待其星散劫掠之時。或當滿載情歸之際。得便則鵬剿零騎。不便則有不明之功。以爲贖罪之地。此將領不得已之謀耳。欲使胡虜膽寒心破。一勞永佚。在我亦當以數萬之衆。堂堂正

正平原曠野，青天白日之下，彼以此來，我以此往，短  
兵相接，使虜大勢敗衄，我則以精騎蹂之，如此一番，  
胡虜喪魄，繇此而罷入衛，開屯田，汰老弱，卽乘隙塞  
上頭頭是計矣。然則用兵幾何？曰：非十萬不可。十萬  
歲費百餘萬金，恐不能從也。然則五萬何如？曰：此亦  
小成而已。必如撼山易撼岳家兵，難乃可。當虜之衝  
突，此則教練之功，不敢諉諸人也。然目今足爲天下  
此論豈獨用兵者之天下不出此。緩急集事者，官莫如守令，兵莫如父子兄弟。而父子  
兄弟之兵，惟守令可以籍召爲今之計，應于河南之

嵩縣等處募足一萬真保河薊一萬宣大廣寧等處  
五千餘山東罷見戍騎兵另募田夫五千餘浙江舊  
兵一萬餘以充教練可也然則募北兵是矣南兵恐  
不宜北用也有慮其不耐沍寒者有慮其魚米湧貴  
日給不足者有慮其不便于風沙與後日之難散者  
曰請言欲取南兵之詳可乎比年倭犯東南浙江軍  
門于數千里外調四方兵以殺倭浙人不堪爲兵卽  
有之輒糜于倭自某與今軍門譚公昔守台州共倡  
練浙兵請以三年爲期賴總督不奪于方教之日以

○此○事○甚○要○

別○兵○殺○賊○而○需○其○成○至○期○具○呈○請○戰○遂○從○此○一○無○敗  
挫○凡○四○方○所○調○之○兵○盡○罷○之○故○某○旌○旗○所○至○悉○此○輩  
收○功○某○馭○此○輩○十○三○年○矣○且○此○輩○皆○良○家○子○弟○俱○有  
身○家○可○聚○可○散○惟○恐○其○不○留○毋○虞○其○難○散○况○今○料○集  
大○兵○北○人○爲○多○而○北○方○承○平○日○久○軍○法○久○未○舉○行○初  
集○之○衆○一○旦○加○以○嚴○刑○必○有○腹○心○瓜○牙○以○彈○壓○羣○情  
此○南○兵○之○取○不○可○已○也○况○教○練○生○兵○必○用○條○約○告○示  
兵○愚○卒○也○目○不○知○書○而○告○示○條○約○不○得○人○人○盡○習○卽  
主○將○耳○提○面○命○亦○未○必○能○信○惟○此○輩○與○之○共○伍○中○日

夕言之曰。吾主將昔在吾土。所以練吾者。疾病如何。恤。甘苦如何。同。錢糧如何。得實惠。號令如何。可信。戰陣如何。萬全。賞如何。而明。罰如何。而嚴。人心轉移。期年可格。比之耳提面命。加五倍。比之條約告示。加十倍矣。且鳥銃一枝。乃戰虜長器。比人不習。比匠造亦不如法。此爲南兵慣熟。尤不可已者。如得舊練南兵萬數。先教成一營。以爲師範。分發舊日彀中材官。以練北兵。功省而効倍矣。此論用兵與虜形如此。然必得數萬之衆。而後能禦衝突之虜于原野之間也。乃

若管陣器技。各有制勝之法。大都車步騎三者俱備而相須爲用。故禦衝以車。衛車以步。而車以步卒爲用。步卒以車爲強。騎爲奇兵。隨時指麾無定形也。除車之制度火器等項不贅論。其戰法將車上爲女牆。捍矢石。且取輕便。下有活裙。以出戰卒。如虜以數十騎挑我。則不應。或虜勢大。至五十步時。火器齊舉。虜近車丈餘。步卒于車下出戰。第一行卒持長刀。用平日習法。伏地向前。至遠不離車。五步車卽隨步卒緩進而步。兵齊砍馬足。二行木棍打仆馬之賊。只在仆

時乘其跌落。身體仰覆。屈伸未得。乃可着力。三四行。鈇鎗雜上。以打戳之。如或力倦。退保車內。又用火器衝放一次。將本營別設真正勇將精兵。平日主將馭之。如子者三千。更番乘勢。如環無端。至于制管法。操號令。構器械。此將事無論也。然則目今在管之車亦可用乎。曰近日用車者。往往犯六敗之道。某之所恃在能反之耳。何謂六敗。平日教場操演。乃無利害之地。從容中節。便可爲用。若臨陣生歿目前。心忙手亂。每致火藥自焚。一也。今以瓶置火藥于別車。平日習





輜。每車佔地一丈。每面不過五十丈。以五十丈之陣。而當數萬之虜。四面環攻。所謂小敵之堅。大敵之擒。四也。若兵止萬數。用車不如用騎。可戰可退之為得也。今用車必以十萬。或五萬。或數車為一營。圓如小堡。或數十車為一營。圓如一大堡。或數百車為一營。分而不離。合而不襍。各開馳道。星碁錯綜。高下原阻。而此制使其能散佔地十餘里。如虜稱十萬。其實不過五六萬。四面分攻。每面不過數千。彼分而弱。矢石不能逾一面之車。以及對過之背。我面面足以制之。如聚攻一面。則諸

車重物也。而此制使其能輕車速器也。

營各以其便。舉車而前。卽一營有失。諸營可勝。此則  
平日聚練一隅。朝夕撫摩。嚴刑聯束。血脉貫通。臂指  
相應。一營勢危。諸營協救。此四變也。或謂車戰宜平  
原。薊多山險。非車所利。五也。此執方而用藥者。夫以  
地就車。地不可移。以車就地。隨地得便。古法云。車不  
得方軌。騎不得成列。若使車軌不可方。而騎列不能  
成。此取敗之道矣。但彼來此往。險則共之。以車塞險。  
尤爲吾利。倣如此地。可容數車。則數車一營。可容百  
車。則百車一營。可容千車。則千車一營。隨地爲勢。分

而不可斷。聚而不可亂。何嘗難于險仄。而爲拘方之  
器。此五變也。往時無制之兵。人各一心。號令不明。畏  
敵而不畏將。只靠一車之用。使靡兵而恃車用命。乃  
必敗之道六也。今練使合兵萬人一心。上下同欲。畏  
將而不畏敵。真有短刃地闢必效之心。敵愾之氣。但  
恐虜騎衝突。勢不可前。藉車導引以前耳。是旣稱爲  
戰車。必用之而戰。此六變也。或謂戰守當併論。今蘄  
山川險阻。能守而使之不入。不更愈于戰乎。曰兵法  
全國爲上。守險正全國之道也。蘄莫善于守。但邊地

縈遠備裨而下分守一區成百數里未必人人皆才  
且數丈一人卽岳家軍亦不足當萬衆聚攻之虜而  
大將一身不能遍及總隊威輕何以制命所以教練  
車兵正爲固守之計也聲息未至則移車近地移兵  
乘牆據邊而守萬一守不足恃而復無重兵尙戰將  
任其衝突而無策矣况今履霜之形衣袵之戒薊邊  
守在腹心宣大之虜佳牧境內山西稱弱陝斷懸城  
遼當凶歲之後行伍未復虜當二百年生長之盛勢  
必爲患于中國可無練成節制重兵一枝以爲緩急

之備哉。今以大議未決，乃不得已，遂以募兵一節，釐爲上策，而又出中策，欲某節制四鎮，而仍聽命于制府。就邊鄙之見，伍入衛之戍卒，從宜教練，轉弱爲強。嗚呼！上策必以十萬訓練爲遊兵，隨賊向往。三萬之議，計效竟得中策。如就中補偏救弊，恐終落舊套矣。豈知練兵數萬，充遊兵，破強虜，逆視之誠難。但虜之強固自若，而我以因循積怯，素未講戰，自誘于不可爲。此某所以竊敢有請也。倘蒙軫念邊事，大賜振刷，欲聚兵則不知有擾，而無意外之慮；掣兵則循軌返。

籍而無難散之憂、堂堂正正、所向無前、事易而功倍之爲。國遠謀一勞永佚、若竟求上策、則愚疏十萬之圖、乞留意焉。

議分薊區爲十二路、設東西協守、分統其路、建製車營、配以馬步兵、而合練之。

薊鎮分守

初薊鎮舊疆、止有東西二區、分爲左右二偏、後因虜犯多事、始增爲十區、既又減爲九區、復裁爲七區、又立爲十一路、沿革靡常、今乃度邊隘、衝緩道、里遠近、分爲十二路、時松棚喜峰山海臺頭四路、皆提戎任

事未設路將，乃以建昌營遊擊改協守東路副總兵，分理松棚、太平、燕河、臺頭、石門、山海等處，而以巡撫標兵屬之。則當兩防之際，俱赴建昌合練，而後以一營駐建昌，一營駐燕河，以備燕石東西之警。就近首先迎敵，次則鎮管，次則西協，次則昌鎮，各標兵以次而至。以石匣營遊擊改協守西路副總兵，分理馬蘭、墻子嶺、曹家寨、古北、石塘等路，而以總督標兵屬之。則當兩防之際，俱赴密雲合練，而後以一營駐密雲，一營駐石匣，以備墻古石三路之警。就近首先迎敵。



次則本鎮。次則昌平。次則東路協守。各標兵以次而至。其本鎮營標兵。則駐練三屯。當兩防之際。俱在鎮以備馬松太三路之警。先期馳赴截擊。在東則東協。在西則西協。各就近首先迎敵。次則昌鎮各標兵。以次而至。仍每路設一將領。各統兵三千餘人。舊兵不足。益以新兵。犬牙相制。以爲犄角之勢。凡遇調遣。每營路各以騎兵二千先馳赴邊拒敵。兵車隨進。至本路各要口。拒截以待接戰。其各路策應。於各鎮入衛之軍。次第前進。皆以調兵文到爲始。違期者以逗遛。

論其器械舊可用者更新之、不堪者改設之、原未有者創造之、若藤牌長刀鳥銃神鎗火箭佛郎機虎蹲砲六合鏡百子鏡等器皆禦虜利器、仍遣教師于各路訓練、設專官督之、又立車營七座、以東路副總兵一營、合巡撫標下一營駐建昌、遵化、以西路副總兵一營、合總督標下一營駐石匣、密雲、薊鎮總兵二營駐三屯、昌平總兵一營駐昌平、凡攻戰用之環衛、一則可以束部伍、一則可以爲營壁、一則可以代甲冑、虜馬擁衆、無計可逼、我得以展其所長、實爲禦虜之

便車兵扎營而後更將兵馬通融挑選五百四十以  
充中部三司每司旗下量選次等一隊以充火器其  
左右二部亦須精健列隊俱為臨時出奇之用若全  
勝則車營必不分其功或偶退却兵賊混淆兩馬追  
逐之時決難接營開車致使兵賊相亂所關不小應  
併行定議以免臨時有誤。

築臺規則

築臺

相基之法要在內外合一山平墻低坡小勢衝之處  
則密之高坡陡墻之處則疎之固為一定之勢但就

其灣環遠對之狀。各有相宜之勢。當必建不可已之處。卽不合丈尺。亦當建築不可移之。而必就于合式之地。又有內山。雖不甚高。看之似衝。而口外橫山遠峙。只有鳥道。僅通屬夷。其餘通馬處所。相隔千峰萬障。似衝而緩者。又有山高萬仞。其外梁頗平。雖有墻坡險處。而直對大舉正路。似緩而衝者。于此酌處。又難一律也。一定臺基以十三丈。收頂以十丈爲則。二百四五十人可完一座。每年可完臺七十座。此其大較也。一臺制尤當隨地置形。如墻外地寬。則臺當

多出如地狹則臺當少出如脊尖削內外俱狹則當稍闊其兩面險其兩傍以無失周圍十二丈之意則制度如指諸掌矣。一邊墻多就外險故外下而內高其上當以外面臨虜處計高三丈內面但隨山勢不必拘于三丈其外旣險又係低下則臺不必出止就高處起臺不復拘以低處而臺在墻之外况山勢迂迴自有灣突處是又在相基者有活法耳。一臺基用石矣但方石恐難猝得碎石勢必不固如石便用石不便則用磚有膠粘好土則以三合土爲之各

從便求堅。但三合土須厚。至頂亦得二尺乃堅也。  
一臺下暗門。未免稍虛其中。而邊匠率愚拙弗省。恐  
造不如法。及不堅固。意臺下築實。臺門移而上。外置  
一梯。虜至則抽去其梯。似亦穩便。然臺用跨牆。則下  
層止用實築。至第二層。則從城牆開門而上。即便矣。  
不必如前式。拘定在臺之中也。

議夷情

薊鎮屬夷

薊鎮屬夷。比他鎮不同。處之得其道。真可爲我嚮導。  
哨報。能尊中國而安邊徼也。近日邊關撫賞太濫。

深損 國威積薪厝火之上。惟此一事爲隱禍焉。夫  
邊將差尖夜出口哨探夷情。遠出數百里。近亦數十  
里。此必不可已者。口外孤身跋涉。非夷虜敵明矣。將  
領頭目嚴守邊關。必不能隨尖哨出口亦明矣。口外  
尖夜透迤。匍伏深山窮谷之間。千叢萬林之內。虜騎  
不時。豈能逃避。萬一被傷。非將官智力所能防範者。  
近年并將口外尖哨被虜者。一槩因他事遷怒。悉歸  
將領。而姦猾屬夷。聞知此風。不論應賞與不應賞。關  
口。悉恣要索。不應卽以捉拿尖夜爲名。云我拿尖夜

尖夜有明哨暗哨之法。暗哨不可開之。屬夷若明哨不若卽限某部爲之。嚮導觀其順逆以爲賞。

殺了。教你就有禍到。你還得在此阻我不。故將官無  
不曲從之也。相沿之弊。遂被屬夷明白殺我軍。卽奉  
有明旨處究。裁革貢賞者。各官恐其捕捉。尖夜爲  
累。俱千方百法。設辭欺朝廷。欺上司。卽不明白賞  
待。而暗亦賞之。以此犬羊之性。愈縱。邊關賞額日增。  
巧立採柴之名。科歛軍士月糧。以致貧軍逃竄。只此  
一法失中。遂遺無窮之害。邊塞空虛。全坐于此。今該  
職行邊間。但見每處俱稱革賞。夷人某處潛伏。要行  
拿尖哨挾賞。夫賞謂之挾。朝廷之威掃地矣。况今



建空心臺。每日皆出關採辦。兵馬有限。防備無時。顧此疎彼。竟當有失。今查得一二起夷人。久作逆叛。擄殺官軍。已蒙犒賞。多係欽捕之徒。近復導虜窺犯。見在邊方。日伏夜行。計欲拏襲採辦空心臺。料官軍此徒不振。之以威明正典刑。終無已時。若得一舉之後。諸夷振肅。感畏兼行。庶可無虞也。

建輜重營

建輜重營

議得師行糧從。古今通議。樵蘇後爨。師不宿飽。薊鎮每遇虜入。軍人騎一馬。卽盛甲什物。已極力難前。別

無馱載馬騾、往往枵腹數日、徒具人形、莫能荷戈焉。望塵戰、如四十二年、雖以宣大軍門之尊、亦不免與士卒同餓山頂、視賊出入而不能誰何、其經過城墜、卽有本色艸料積貯、彼時追賊之機、毫不容髮、數萬之衆、若候總入一倉支放、亦得一二日乃完、不知馳騫之虜、行百里矣。故虜入內、必變客爲主。我軍常以主爲客。職此之繇也。合無于密雲遵化建昌設輜重車三營、每營一百二十輛、附以火器、用騾十頭、養騾軍十名、給與軍器、題請 欽依叅遊一員統領、將各

色煤炒乾糧馬料預先發各衙門收貯內料豆各倉口預給無事則牧放騾頭操練火器晒曝輜重有事則隨營而進發糧盡則就近而運取遇虜卽依大軍爲勢以車爲營此項須緊急缺乏方用以軍中所必用而不可缺者也。

### 薊鎮急務

建臺練戰

薊鎮急務惟有四事曰建臺曰練戰曰管田曰種樹使其人各一役相濟而不相妨可也但主客邊軍有額數日漸消滅未見增益四事何以並舉然職之專

責務之嚴急者。其惟戰與守乎。夫守固以築臺爲策。而戰必以練兵爲先。今若專言戰。勢必不妨修工。如執于築臺。勢必不得教練。查得每區每枝。尚有主客援兵。今亦俱派臺工。合無于內量爲抽編行伍。逐區容職酌量多寡。強弱于有馬之內。定擬數目。每月操三日。每操一日前。容免修工。一月之內。歇工三日。只是實編入。援見伍者。其餘馬步。照舊做工。如此修中。有練。其實練少爲多。視之往年。薊鎮兵馬。遇有虜入。未嘗不早應援兵。未嘗不集聽調度。但因平日教練。

無紀約束未行。以致臨時對壘風塵昏慘之際。不復能辨某枝某營。倉卒撲擠一團。爭安避險。禁如亂絲。所謂雖多亦少。蓋坐此弊也。今擬自三屯營爲中。以東路五區爲一大營。西路五區爲一大營。各配成五方。每區爲一色。給與號令操法。發與器械式樣。做工之日。照前聽各區主客將官。各將主客援兵一月抽操三次。本職到處不拘日期調操。教練斯戰守有裨實用矣。至于栽樹遮虜。今已爲奇策焉。不知木多生險難跡稀之處。牛羊踐踏之所。未有易生者。若沙河

石岸。又用何法栽種。見今日外林樹如織。未見止却虜馬。北方風寒土燥。雖有樹木。竟是稀疏。不比南方土濕雨多。藤木糾纏。猿猱莫扳。此其一也。况惟桺榆易栽。而山險之地。栽難必茂。此其二也。近日又撥軍屯田。遠在百餘里外。凡耕種牧獲之時。正春秋兩防之日。擺邊修工。尚且不足。何乃棄營數百餘里務農。聚兵教戰。此惟行之標兵。何離若責之區軍入衛者。誠難。則以盡數派築空心臺。每防止起二三十座。若分一班種田。又分一班操練。又分一班築臺。又責一

班種木。是一歲之間。一防之內。僅可得臺十座。猶是石塘古北墻子三路能之。蓋彼三路墻坡已完。關營俱竣。得以專力故耳。若松太燕臺石五區。邊墻未有者。十尚二三。灰水粉飾。一戩可頽者。連數百里皆然。築臺則墻工必廢。修墻則不能築臺。實爲兩難。卽臺工姑約以三年未必能畢。則邊墻偏坡。又當坍塌過半。工役相尋。尚無已時。今必欲一面築臺。一面種田。一面種木。一面教戰。四事並舉。須得如此三四項人。始可辦之。恐竭國之力。亦有所不能也。夫古人屯田。

謂彼處拋荒俱在目前。客軍適居其地。列屯坐食。不如務耕。人自用力。故其法行而軍便之。今皆強其勢所不便。力所不能。是以難易分焉。而栽木營田兩者。誠未見其可也。



皇明經世文編卷之三百五十

陳子龍臥子 宋徵璧尚木

華亭

徐孚遠闇公 李待問存我

編輯

朱 積早服參閱

戚少保文集

書

戚繼光

上軍政事宜

嚴軍令

職自承乏薊鎮已數月矣其於人情隱伏行伍習套似若明見肺腑敢不披瀝言之大都自將領以及軍

士皆以阿諛奉承爲念。只顧眼前，再不慮後事何如也。嘗聞未戰而廟算勝者，得算多也。夫所謂廟算勝者，未必廟堂之算。蓋凡未出軍之前，預籌于轅門者，皆算也。亦嘗聚將士羣坐而籌之曰：今日與衆人共計，卽是廟算。試屈指而籌，夫虜技以弓矢爲第一。我亦弓矢應之，弓不如虜勁，矢不如虜利，射不如虜近。是弓矢之算，弗如虜也。虜近身則以短刀，刀長三尺。敵爲本，故有見之言。尺，肱長二尺，五尺之間，可以殺人。今我軍弓矢之外，近身亦有短刀，刀不如虜之利，膽不如虜之壯。是刀

之算不如虜也。虜以馬馳逐我亦馬應之。虜皆二二三其馬。且臆壯而慣習之。我軍一馬。又皆羸弱。是馬之算弗如虜也。虜以馬衝。我以步應之。挑濠則爲自守計。非却虜也。若出步戰。必不能當羣馬之衝突。卽拚命立定。則盔甲破碎。澆薄不如虜。而無可當虜者。是地鬪之算弗如虜也。外此惟有火器。奈何快鎗之制。手執柄後。藥發手前。兩手不能持貫。氣力拘兢。何以命中。况鉛子不圓。火藥不速。卽以一營之軍三千俱爲火器。一字列之前行。發銃後行。不得復舉。又恐一

放而盡也。必須分爲八九班。是三千之火器。八九班輪之。每次僅得三四百。是臨時心忙手顛。其不如法點滅火門者。又數百。不過二百餘發。而二百餘內。又不過數十命中。命中又不能透甲。是大隊之虜。非快鎗能勝矣。快鎗外復有大砲。似可當虜聚冲。但大砲必防躍退。須去營二三十步。而往點艱難。又加重滯。馱運不多。再若分番。其勢愈寡。是我在軍之衆。不必出陣原野。而閉門算計。已件件遜虜著著輸虜矣。况虜衆數萬一心。心齊力一。較我渙散無紀之衆。又

何如也。若使情贖而往，僥倖而圖，此職所不敢也。乃再三戒諭兵家之事，短不接長，必須每事長他一分。如他有弓矢之利，我以何物勝其弓矢；他有短刀之利，我以何物勝其短刀；他有萬馬衝突，我以何物當他衝突；使他件件不及我，般般短於我。如此算定出門，臨時慌忙還有錯誤，而況於安心故套。覬憑天幸耶。然士之情，所以寧阿諛，僥倖不思對壘之計，而惟算勝之圖者，皆因此來。朝廷法令，止行于督撫鎮守，乃與虜出入之一二偏裨耳。哨將而下，以及士卒。

軍法罔及。且賊未出邊。而錦衣官校已踵其後。總兵官或陣亡。或被逮。而督撫亦拿入京。其誤事者。詎暇以退縮軍法治之耶。以此人皆玩習爲常。又聞往日督撫總兵。無賊之時。明受其阿奉。而徃于太平。不好過求。及至臨時。自知禍已不遠。每每益從寬馭。冀其用力。軍法絕然不行。各偏裨以至士卒。無事之時。尚皆謹慎。遵奉命令。有事之日。與對壘之時。明白欺玩。得躲便躲。得挨便挨。其應對之辭。放肆恣縱。無復名分。甚至剛愎抗傲。不用號令。自爲一夥。或以剛惡跋

扈或以柔奸媚免。有何干繫之足畏也。此套不能挽回。此心不能警換。便日日操時時練。長鎗大棒。堅車壯馬。徒勞心力。徒費帑藏。亦何益于成敗之算哉。今職或于言之而不從者。面奉而背違者。稍振之以法。示之以威。便互相黨聚。或爲飛語。或粘匿帖。或布流言。或伺上意。無所不用其心。以爲阻撓害成之計。嗟乎。欲求今日之言信令行。而使將領軍士。一改前項之念。必須將舊日從賊入墻陷逮原主者。查治以法。庶幾少懲其大者。更須疏請於朝。明立章程。自後

有事之日。在 朝廷拿治督撫鎮巡。追卹陣亡總參  
遊守等官外。其標部將領中軍千把總等項。聽接管  
督撫鎮巡衙門挨次連坐。逐項究拿。治以軍法。如隊  
長不能用命。或失事。而隊下之軍。一體照隊長之罪。  
其自隊長而上。以至督撫。一體皆然。如督撫總兵失  
事被逮。或陣亡。則部下中軍參遊一體。以督撫總兵  
之罪罪之。下至士卒。一體皆然。必期轉移。卽有流言  
計阻。並不爲其所奪。然須積以歲月。而盡其淪浹之  
功。庶可收齊一之効也。



陳邊情及守操戰車

邊情者。比其材。邊者。則游根也。

竊以邊人大都五分類。夷五分有京師氣習。其轉移非嚴不克。若任真到底。久亦自服。他日濟事者此也。否則無事之時。布言感恩。有事之際。仍襲玩套。送上司入朝廷。斧鉞中。則餘皆束手高談。悻悻得計。其接任者。又復姑息。從未把前任誤事。偏禪查究。以此人入得慣。一也。夫南兵南將。凡有條約。上下講讀。信而畏之。此間將領而下。十無一二能辨魯魚。復有自己敕諭。不曾記得一字。如練兵條約。連坐保結。節制甚

明其戍邊之吏士不識字者固非得已。識字者且效白丁之習。二也。職又細詢邊情。皆云某年賊到。乃不信。哨報之失。某年賊到。乃哨報遲悞之失。某年賊到。乃一時邊牆無人之失。又云若有兵到。無不阻截成功。然皆面言欺人。多飾妄說。凡大賊臨邊。幾曾不預得哨探。幾曾不分布兵馬。幾曾兵馬不到地方。緣東來山雖高聳。外面山梁延長。高下不峻。林石無碍。俱可馳馬。經至牆下。或外面山梁十餘道。而內之縈迴。則數十里者。守兵數塚一人。援兵馳集不及。卽有一

二枝到。若照守邊之卒疎布。則無濟于事。必須密密布之。又要設疑高處。三千一枝。卽分不過數里。虜騎數萬。首尾橫布百數里。分投亂攻。必有一處疎虞。此所以千方百計爲守禦計。而攻無不入者也。至于戰陣一節。詢之舊格。凡諸軍教場操習。以爲觀美之具。臨時一毫無用。惟挑濠固守者。便爲上軍良將。斷斷然無鬪志也。職謂卽今所操。便爲戰虜實事。彼尤謂面前套數。且以面前套數應之。臨陣時謂不得不繇他耳。又戰車爲萬全之策。人人知之矣。但狡虜傍山

沿壑臺營移走。非車所及。此節終不可免。亦須爲之再計。近造小車一輛。樣如原車而輕且便利也。以上三項等情。乞亮職言不虛。留心區畫。而邊事庶或有濟也。

覆部議入衛兵馬

選練義勇

調取邊兵入衛。初因薊兵少。習虜情。邊兵慣經戰陣。欲資爲原野交鋒之用也。然薊兵之所以少。習虜情者。蓋以薊鎮山障墻坡有險可據。重在于守。虜非三四年間東西合勢。不得輒入。爲其見敵者少也。邊兵

所以慣經戰陣者，蓋以各邊平原易犯，零虜時入，爲其經戰者多也。緣自調取入衛以來，邊兵久不見賊，

調各邊衛前大非策也

遂亦因而懈弛，乃致彼鎮行伍，稱爲煎銷，而視此鎮邊防，若爲故事耳。今欲入衛兵馬，每營量減一千，或五百，選摘土兵補入邊兵，同練似矣。但所以必用邊兵者，爲夾持于對壘之時，帥練于臨敵之秋。邊兵之所以難減者，一也。又况薊昌二鎮邊情，以守爲先，守而不失，然後求戰邊牆，逶迤二千四百餘里，計地料人，雖逾二三十萬，亦且不足。而我守塚則勢分，虜聚

攻則勢重。數里之間。又須墻下分設馳援。兵馬隨警策應。今併主客合守。每每猶稱單弱。若擬減兵。則邊墻塚只數目。不能縮少。是減一名。必得一名以補其闕。此邊兵之所以難減者。二也。但陝西入衛官軍。道路既遠。更代復頻。該班者甫來。而踐更者又當遣發。彼處懸邊孤寨。兵力有限。均爲朝廷地方。所謂無尺寸之膚不愛。宜無尺寸之膚不養。合無以二年爲期。仍以五枝分番。但每枝減去五百。行彼督撫鎮守。須知減去兵數。無非體恤彼中之難。亦以見蒞鎮求

精不求多之意。以後遣兵入衛，務選慣戰壯軍。麤健  
好馬，精利器械，驍勇將領，到薊之後，如有成功，一體  
論賞。若果不堪，怯于戰鬪，部來將領，從重處治。閱發  
衙門一體論及。庶痛痒相關，俾得實用。及照土兵以  
漸而練一節，職等叨受地方重寄，敢不殫力極慮，而  
歲歲仰藉于人，豈無厚顏于已。但補練之事，經今已  
十餘年，而又專職憲臣協力督撫，其期不可謂不久。  
其責不可謂不嚴，其任事不可謂不得其人。夫賢才  
之選，至督撫極矣。任法之嚴，至憲臺極矣。寬假之恩

至十年極矣。而尚未得效者。實薊鎮無人可補。無中肯綮之練也。况今督撫受任未及年餘。本職領鎮方數閱月。輒謂額缺補充。教練成效。誠不能一掘九仞。而反十年不可醫之疾也。爲今之計。第一當急求精兵數萬。培植京師根本之地。次及薊昌。次及各邊。次及腹裏。但僉派民壯。方今民窮財盡。應命艱難。若抽此皆凡遠兵格套游惰成風。勸收官莊丁。例戶。選見役之徒。則府州縣城池。國初賴于軍衛以制僉派爲難。故公不欲用前人而身傷山僻。快恩之一。禦者。今皆無足恃。而獨恃于此。且有司又用之爲送民終得其功也。公亦難于盡言爾。迎之具。牢不可破。而素無厚養。豈能戍邊。令無通行。



兩直隸河南浙江湖廣江西山陝等處軍衛有司比  
照貢士之法而以巡按總其事酌量州縣大小里戶  
多寡選舉驍勇之士年二十以上四十以下相貌雄  
偉力舉三百斤以上者州縣大者歲選五名州縣小  
者歲選三名每衛內有五所以外者選二名五所以  
內者選一名分別地里遠近起送赴京名爲貢義士  
每年不拘地里遠近俱限五月中到部本部預鑄三  
百斤鐵人一個令其肩負往來行一里爲合式夫貢  
選勇士專于力者緣武藝器技之習歲月可能一教

習之勞耳。至于膽力天賦，非人力可成者，既有大力以爲之本，再習精諸技，一可當十。選中送隸戎政衙門，擇一善練謀勇戰將統之。以七月爲始，發於薊鎮標下，編伍教練，兼以防邊，不許分調零散。擺邊做工十二月，送回京師大營，隨操休息。至次年七月亦如之。但千里之足，旣至而撫贍不可不厚。各色旣殊，他軍自難比例。以一田夫而蒙此優養，自然比之卒伍，愈當竭力報主。其給糧之則，每名每月家小在京倉支糧一石，本身日給工食銀一錢。各騎戰馬京邊支

草料軍火器械卽於自工食內聽練兵將官發式自造使用各役名爲義兵不作軍數是養之旣厚論之旣明則人自肯來民又不擾通一歲計可得三千有零十年可得三萬有零且天下驍健之選如得名將教以實練真正法眼不爲虛套所誤申明嚴令必信必行是三萬之義旅卽可當十萬之邊軍以後日積月累合天下之力以實京師以強根本蒞中國而撫四夷無有不克者矣如慮錢糧過多處辦不給見今京軍逃亡者不知其幾當時開銷過錢糧總積在倉

并國初原額三十二萬。見今所缺錢糧。務要一體解足。存貯倉內。如此則京師之軍。見在九萬名。一查之間。一年之內。可減二三萬。足養若干。三十二萬原額之內。除去見操九萬。尚有十數萬。清出一半。所得工食。可養若干。及查取南如福建浙江江西南直隸等省各衛所原額官軍。十不存三。而額徵倉糧足支之外。尚餘半倍。合無于內查照額數。缺軍米石。照數解京。不下數十萬。又可養若干。以三萬爲率。則清查舊糧。逋額。便足供之。何慮錢糧之不給哉。夫京師有

此三萬再加額軍四五萬務不減十萬之數則戰必勝。守必固。內順治。外威嚴。根本固而發源深。億萬年靈長之祚。此其一助矣。

### 上政府禦虜

薊鎮雖列九邊之數。其虜情軍情。守勢戰勢。種種不同。今虜西犯。則古北。瑤子嶺。馬蘭谷。皆其必攻必繇者。言古北則曹家寨。一路在其中矣。言馬蘭則松棚。一路在其中矣。二路從曹馬分出。計其最要者五路。惟石塘一路稍緩。東犯臺頭。燕河。太平東半。石門西。

半。皆當其衝。而石門之東。太平之西。雖稍次于燕臺。亦非不戒嚴之地。計其最要者四路。是全鎮長短。十路間。無所不當備矣。若必欲無所不備。量地計軍。僅三分之一。衝處尚須一垛五六軍。更急處十餘軍。其內地撥馬隨警。援兵守關寨城池。與老弱幼小不及計也。惟聚犯則守兵勢厚。分犯則路路可以聚攻。今乃酌量緩急。分別衝僻。不應守者。或只存瞭望之役。所當備者。乃聚全標之師。軍門督一副二標。專分西四路。本職督二標。專分中三路。撫院一副二標。專

分東三路，而隨時緩急，又不論信地，相機奔馳以應之。連標兵援兵主客，每路僅萬人耳，而墻子嶺尚少援兵一枝，松棚尚少勁兵二枝，太平尚少協兵一枝，石門寨尚少勁兵一枝，山海關路險固，責以自守，通計還得勁兵五枝，庶乎無所不備，無所不密矣。然議減罷者，尚未停筆，今惟計虜若東行已深，勢必難復西向，聽軍門調昌鎮守邊客兵，就近互移，以補東方之缺而已。賊如合夥或東或西，專攻一二路，聞報調奏軍馬以併力，職等保爲守固，必收乎全國之効。若

今之分山永分則鎮亦誠有不得已也

東則極東西則極西。二路分犯。而西虜勢衆於一路之內。又分攻古曹墻馬松之間。勢必不能萬全。萬有一處疎虞。不惟兵馬四分。職等亦策應有限也。豈能分身處處有一督撫總兵乎。於此若堵得一路回職。集全鎮之兵。堂堂一戰。卽收奇功。未可預料。但恐二處俱入。則兵馬爲所分隔。須各照地方分應。勢孤力寡。是所可憂。姑以兵馬得聚。及預算數著而籌之。其未入也。設機于要路。特以疑之。卽不能皆中。彼可疑而退。或因獲山探路。遲遲及墻。我可調度援兵。一也。



牆臺之上，竭力守禦，二也。卽有數百先登之賊，可以南兵仰逐出之，只恐不得遇，不慮不得勝，三也。萬一潰入，調集重兵，以車營追截，決一大戰，或可擊逐，使傷使亂，而首功難多。馬兵未可輕縱，以後相機出奇，皆難預擬，四也。及其情歸沿邊布諸路步卒于險，職等棄車在後，各將馬兵，每將官爲一股，職當其中堅，一二十股，各拚一死，一齊砍殺，務獲奇功，以舒數年神人之憤，卽有矢石之危，盡吾致身之分，如功不滿志，俟其出口，職等親帶精兵，乘懈夜出，追砍其營，必

獲功如願而後返，否則決不生還，以負明時豢養。五也。此五者皆守戰之策，乃若分布不足一節，非職預爲已地，非諉之兵少，亦非敢分咎于減兵，但爲邊方大計，欲望臺下知邊事真情真狀，免爲分沓不一之議，搖惑於胸中耳。

設備附臺軍營

設營

沿邊修建敵臺，卽爲擺設官軍之家。當使之臨敵不走，見今敵臺修建未多，紛紛報警，有敵臺處卽爲有家可據，但敵臺止可安人，無處牧馬，將馬散在牆下。

亦非長策。其各該客兵將領，須將各擺守官軍，照各分信地，相去四五十步，卽共劄一營，以爲家。有敵臺去處，卽就臺爲營，敵臺內一面，仍用亂石疊砌五六尺高小墻十餘丈，如月城樣，以便安馬。無敵臺處，卽據舊臺，或護墻臺，劄一營以爲家。墩下內面亦以石疊成墻。無舊墩臺處，卽據墻上以山險爲之。但周圍俱要疊成院墻，或以木柵圍轉亦可。遇警之時，照舊擺列信地，奮勇拒堵。至十分危急，或賊從他處潰入，卽將各軍收入臺墩之內，併力截禦，並不得以往年。

見賊輒走。但有一人潰散。本管千百旗總。許登時將本軍斬首示衆。故縱者同罪。其牆內之寬窄。則視兵之多少爲之。如此則我常立于不敗之地。決無不可固守之理。其各該標兵援兵。一體各就臺就墩就險。各下一老營以爲家。有行營牌者。卽用牌劄。無行營牌者。亦用石疊。各先將馬匹收在老營之內。一遇事勢緊急。擺牆之兵。皆歸老營。據營以守。標兵又將重車併列一營。在總括路口。輕車移就邊上適中去處。劄下一營。或二營。聽候聚兵決戰。虜卽入邊。當其初

入見我兵在營不動。又有車營在彼，決不敢放手拆。墻我兵聚齊與戰，決可驅之退走。萬一不然，亦收入大車與之大決一戰，定不許深入內地。各該在邊將官務要先時料理，各該標兵亦要先期計定，免至臨時愴惶悞事。

### 條陳尖哨事宜

一尖哨深入虜營，無非欲得虜之消息。而時日久近，以虜情爲遲速，務在預偵的當，馳報須先虜數目。入已後期，以軍法重究。其未及哨所，或爲虜縛，亦不能

無如今春所探本爲辛愛聞各役徑入辛愛營與彼面見卽取其辭以爲情實萬一執留或因而殺之在我安心待報在彼突然而來不可不慮也惟有多差廣探卽被執之人我無不知各役須當散處凡遇變知風卽便騰山傳報有失亦必有得也但暗哨之人不許與明哨相約使各自爲哨在內則多方設備如虜在前不許恃有哨探疎于防守則萬無一失矣。

一選尖哨必其慣習虜情能夷言而熟識夷人者如積年能事之徒卽無身家不得遺棄大約嚴加精選

取具連名結狀。不堪者連及將官。一哨夜出口必  
費賞物。兩無對證。其侵漁之弊。或不能免。惟事期其  
濟。勿問出入可也。尖夜銀每路已發到百兩。先以其  
半買物。聽軍門撫院本鎮緊急差人出口之用。其可  
以從容備者。不許槩用。以致臨時缺乏。稽遲出口者。  
罪坐本提。一薊之積弊。急則懸萬金之賞。而不吝。  
功成則百方媒孽之。有吝賞之意。遂使掩功爲罪。不  
止騙誘屬吏無信已也。昔年把都兒議何坊伯彥得  
信冒雨入報。始得堵退。及事寧。止賞銀五兩。曲突徙

薪恩澤何在。爲今之計，不可恃有此輩。遂緩我備，亦不可恃我有備，而遂疎此輩。有備無患，事權在我，不

過假此添一層藩籬耳。近聞撫賞濫惡，未免怨咨。以

扶賞測與之功，賞則吝惜，屬夫所以輕且怨也。

後屬夷報信成功一體陞賞，并入敘功疏內。其各夷行喜峯大關差人喚集受賞，仍行各參提照常夷數准賞，不許增加一名。其賞物不堪，將官之罪。一名

路尖夜五千有奇，率皆壯健，倍食于軍。相應通行編伍操練。該路甚少者，量行增添。各路分春秋兩班，春防以秋班操練，春班者出口明哨暗哨架砲秋防互



換。每防三月仍聽本鎮差官同該路操練。遇警先守本路。聽參遊提調。如賊團聚沿邊。追賊而來。聽本鎮調用。

議撫賞 屬夷撫賞

薊鎮之有屬夷。國初時爲藩籬。今乃藉爲耳目。故歲有賞予以示羈縻。然撫賞之錢糧有限。犬羊之請乞無窮。部落日增。歲費日廣。于是帑銀不足。則扣其月糧。月糧不足。則繼以樵採。甚至正軍不足。連及餘丁。餘丁不足。編及妻室。計日收柴。計丁納銀。剗肉補

瘡。剝骨見髓。則軍不勝苦。而逃斃愈繁矣。推原其弊。大端有七。將官不親撫賞。委之管墩夜人員。彼秩微

力薄。曷能彈壓。隨其索求。信口聽許。弊一。守提而下。

盜費易度。而此為甚。以無對証也。

左右廝役。率以為利。任意侵剋。供撫夷者什三。克私

囊者什七。弊二。錢糧給發。每至後期。萬夷叩關。急如

星火。不免揭貸。出息。或增價買物。耗費不貲。弊三。居

常有坐門之夷。臨時有後賞之夷。日日宴賞。動輒百

金。不作正數。弊四。賊夷稍不遂意。輒作反撲。人該關

畏罪。恣行科派。甚至千金贖人。以自免。弊五。或因錢

糧不敷支吾無計。則權而賞票以自寬目前。他日夷人持票而至。信如左券。數且加倍以爲例。弊六。屬吏到關。不問人數。不責非時。不論非額。一槩濫與。此關

與之。彼關相援。弊七。如此則竭軍之力。無以厭夷之

賞裁斷爲難。後來照賞。公處。又有統聚爲差。易也。

欲有增無已。將何底極。該當各路將官。極力擔當。破

格區處。先查某關舊額。應賞某夷部落若干。原人數

若干。給賞若干。今增添部落人數各若干。給賞若干。

應准增若干。量裁若干。每年定擬賞額若干。本關額

發錢糧若干。商稅等項若干。如不足應採辦易價若

千計處停當。呈詳定議施行。候放貢之期。宣諭夷人知會。令各輸服。每遇屬夷扣關。卽飛報本管將領親詣地方。盛陳兵威。以示彈壓。應賞之外。不許濫用一錢一物。該道置立循環。呈請督撫印鈐。轉發各路。每季終將用過錢糧採過柴木賞過夷人數目。并將官臨邊時刻。一併填註倒換。其應發銀兩。每於春季以上年十二月給發。秋季五日給發。預辦賞物。以備倉卒。其軍人採辦柴木。半歸官。半歸軍。免生嗟怨。如有將官不親撫賞者。以怯懦不才叅究。守提以下。或扣

軍糧。匿採辦。并濫賞非夷。預出賞票等弊。定行拿問。照沿邊錢糧坐贓重究。仍於本官名下追償所費。其有夷人作歹撲人。追究原係某夷。先革撫賞設法追捕。捕獲仍以功論。不許科衆取贖。自干重典。此欵關係軍機安危。夷情向背。爲今日邊關第一急務。計處毋忽。